



O pleno do Comité Galego de Xustiza Deportiva, reunido o 8 de xullo de 2026, adoptou por unanimidade, en relación co expediente 95/2026 a seguinte resolución:

ANTECEDENTES DE FEITO

PRIMEIRO.- I.- En data 1 de xullo de 2026 tivo entrada recurso interposto por don José Manuel Lopez Castrillon, en representación de CLUB RALLYE RÍAS ALTAS contra acordo adoptados pola Xunta Electoral da Federación Galega de Automobilismo (en diante FGA) na Acta nº3 de data 26 de xulo de 2026, na que mantén a exclusión do censo provisional do estamento de entidades deportivas, o club recorrente.

SEGUNDO.- Con data do 12 de xuño de 2026, procedeuse á exposición pública do censo electoral provisional para as eleccións á Asemblea Xeral da Federación Galega de Automobilismo (FGA). No dito censo non figuraba incluído o Club Rally Rías Altas no estamento de entidades deportivas.

O club recorrente presentou reclamación ante a Xunta Electoral da FGA solicitando a súa inclusión no estamento de entidades deportivas. Mediante a Acta nº 3, do 26 de xuño de 2026, a Xunta Electoral acordou desestimar esta reclamación, fundamentando a súa decisión en que a entidade carecía de licenza federativa en vigor na data da convocatoria, requisito exixido polo Artigo 6.1.b.3 do Regulamento electoral da FGA.

"1º Inscripción polo menos desde o mes de xaneiro de 2024 na Federación Galega de Automobilismo e no Rexistro de Entidades Deportivas de Galicia.

2º Participación e/ou organización nas tempadas 2024 e 2025 nunha competición deportiva oficial, polo menos unha competición en cada tempada.

3º Ter licenza federativa en vigor expedida pola Federación Galega de Automobilismo"

TERCEIRO.- Fronte dita resolución, o Club Rallye Rías Altas interpón recurso electoral ante este Comité, alegando, en síntese:

A vulneración do principio de xerarquía normativa, ao impor o Regulamento electoral un requisito -licenza en vigor- non recollido no Artigo 8. 1 letra b) do Decreto 16/2018 do 15 de febreiro, polo que se establecen as bases e os criterios para a elaboración dos regulamentos electorais que deben rexer a realización dos procesos electorais nas federacións deportivas galegas, modificado polo DECRETO



171/2021, de 23 de decembro que respecto das persoas electoras e elixibles á asemblea xeral sinaladamente neste caso o estamento de entidades deportivas indica;

"Na clase de entidades deportivas, aquelas que cumpren os seguintes requisitos:

1º. Inscripción desde o mes de xaneiro dos dous anos anteriores ao de realización das eleccións na federación correspondente e no Rexistro de Entidades Deportivas de Galicia.

2º. Participación desde o mes de xaneiro dos dous anos anteriores ao de realización das eleccións, polo menos, nunha competición deportiva oficial por cada tempada. No caso de que, por causa de forza maior, non se tivesen realizado competicións deportivas oficiais no período indicado anteriormente, abondará con ter participado nunha competición deportiva oficial na tempada do último calendario oficial desenvuelto"

O cumprimento dos requisitos de antigüidade e actividade deportiva - organización de probas oficiais en 2024 e 2025 -. E a errónea interpretación do propio regulamento electoral, que prevé a organización de probas como alternativa á posesión de licenza, remarcando para concluír a propia diferenza que o propio Decreto establece respecto do requisito da licenza en vigor establecendo un réxime distinto referido as entidades deportivas en comparación con deportistas, técnicos xuíces e árbitros.

CUARTO.- O CGXD admitiu a trámite o Recurso co número 95/2026, acordando que de conformidade co establecido no art. 53 do Decreto 16/2018, debe tramitarse polo procedemento que en materia electoral federativa se regula nos art. 55 e ss. do Decreto 120/2013, de 24 de xullo, polo que se aproba o Regulamento do Comité Galego de Xustiza Deportiva.

QUINTO. Informe da Xunta Electoral: a Xunta Electoral da FGTM remitiu informe o **8 de xullo de 2026**. En relación co expediente 95/2026 xustifica a exclusión defendendo a legalidade do regulamento e falta de requisito de licenza en vigor por parte do club recorrente.

Achegase tamén Certificado emitido por don Román Lamas Fernández, coma Secretario da Comisión Xestora da FGA, que acredita que o club recorrente

1.- NON dispón de licenza federativa da FGA en vigor na tempada 2026.

2.- Figura inscrita no Rexistro de Entidades deportivas con anterioridade a xaneiro do ano 2024.



3.- *Non consta que fose eliminada do censo inicial pola secretaria Xeral para o Deporte da Xunta de Galicia por non estar inscrita no Rexistro de Entidades Deportivas de Galicia.*

4.- *Consta como entidade organizativa nos anos 2024 e 2025 de probas oficiais incluídas no calendario oficial da FGA na especialidades de Rallyes. Non consta como entidade organizativa na tempada 2026.*

5.- *Non consta que compartan alomenos o 50% das licenzas con outra entidade deportiva.*

FUNDAMENTOS DE DEREITO

PRIMEIRO. Primeiro.- Competencia: Competencia do Comité Galego de Xustiza Deportiva.- O artigo 88 da Lei 3/2012, do 2 de abril, do deporte de Galicia establece que no ámbito electoral, a xurisdición deportiva comprende o coñecemento e resolución dos recursos que se formulen contra as decisións que se adopten nos procesos electorais das federacións deportivas.

Pola súa banda, o Decreto 16/2018, do 15 de febreiro, cando regula os recursos que caben fronte as resolucións que se adopten ao longo dun proceso electoral, dispón no seu artigo 51 que contra as resolucións das Xuntas Electorais, procederá recurso electoral ante o CGXD.

En canto ao procedemento aplicable, a propia Lei do Deporte remite ao desenvolvemento regulamentario que atopamos no Decreto 120/2013, polo que se aproba o Regulamento do Comité Galego de Xustiza Deportiva. Este texto dispón que a tramitación dos asuntos electorais debe seguir o procedemento especial regulado nos seus artigos 55 e seguintes.

No presente recurso impugnase a resolución da Xunta Electoral - Acta N°3 - respecto as cales este Comité tería en principio competencia pero, entre os motivos do recurso plantexados atopamos como eixe central a impugnación do artigo 6 do Regulamento Electoral da FGA, particularmente, no relativo á existencia de ter licenza federativa en vigor expedida pola FGA para formar parte do censo de entidades deportivas, debendo neste punto analizar con carácter previo se o Comité é competente para revisar o contido do Regulamento Electoral e, no seu caso, considerar non aplicable ou non exixible un dos seus apartados.

O recorrente entende que esa previsión regulamentaria recollida no artigo 6 relativo a licenza, restrinxe indebidamente o dereito de participación recoñecido ás entidades deportivas e interesa que este Comité deixe sen efecto o referido precepto regulamentario por entender que con esta existencia, o Regulamento Electoral está a engadir un requisito non contemplado no Decreto 16/2018, que



establece as bases e criterios dos Regulamentos Electorais, atentando con elo contra o principio de xerarquía normativa (artículo 9.3 da Constitución Española).

Esta pretensión non pode ser acollida.

Compre partir dunha premisa esencial, o presente procedemento ten por obxecto o control da legalidade dun acordo da Xunta Electoral relativo á confección do censo electoral provisional, non constitúe, polo tanto, un procedemento dirixido á impugnación directa do Regulamento Electoral.

E neste punto, o propio Decreto electoral impide no seu artigo 17.5 de forma expresa que este Comité coñeza do contido do Regulamento, cuxa aprobación definitiva pola Secretaría Xeral para o Deporte esgota a vía administrativa. O referido artigo expón a estes efectos: "A resolución aprobatoria do regulamento electoral pola Secretaría Xeral para o Deporte esgotará a vía administrativa e unicamente poderá ser obxecto de recurso contencioso-administrativo. Non obstante, poderase impugnar ante o Comité Galego de Xustiza Deportiva a convocatoria da asemblea xeral e a adopción do acordo polo que se aproba o regulamento electoral segundo os seus respectivos estatutos. En ningún caso se poderá impugnar ante o Comité Galego de Xustiza Deportiva o contido do regulamento."

No presente expediente, non se cuestiona que o Regulamento Electoral da FGA foi aprobado por unanimidade pola Asemblea Xeral da Federación e posteriormente, ratificado pola Secretaría Xeral para o Deporte mediante resolución de data 18 de maio de 2026, converténdose desde ese momento na norma específica reguladora do proceso electoral, cuxa impugnación non entra dentro das competencias deste Comité.

O recorrente invoca reiteradamente neste aspetco, o principio de máxima participación nos procesos electorais (*pro participatione*) para fundamentar a inclusión da entidade deportiva excluída por falla deste requisito. Este principio constitúe, efectivamente, un criterio interpretativo consolidado tanto pola xurisprudencia constitucional como pola contencioso-administrativa, de tal forma que cando unha norma electoral admita varias interpretacións igualmente razoables deberá preferirse aquela que favoreza o exercicio efectivo dos dereitos de sufraxio activo e pasivo.

Non obstante, este principio non permite prescindir dos requisitos expresamente establecidos pola normativa electoral nin autoriza aos órganos revisores -como é este Comité- a crear excepcións non previstas polo lexislador.

O principio *pro participatione* actúa como criterio interpretativo fronte á dúbida normativa pero non opera, pola contra, cando a norma resulta clara e expresa como é o caso do artigo 6 do Regulamento Electoral, onde non se cuestiona



a súa interpretación pola Xunta Electoral senón á súa propia validez, excedendo do principio invocado

Por conseguinte, o principio invocado polo recorrente non resulta suficiente para deixar sen aplicación un requisito expresamente establecido no Regulamento Electoral vixente.

En consecuencia, a análise deste recurso debe realizarse partindo da plena vixencia do Regulamento Electoral, sen prexuízo das accións que, de ser o caso, poidan corresponder ao recorrente fronte contido do Regulamento electoral cuestionado na vía xurisdiccional contencioso administrativa.

Segundo.- Lexitimación.- A recorrente ten lexitimación activa para reclamar contra a súa exclusión do censo de entidades deportivas ao constar como club organizador de probas do calendario oficial e estar inscrito no rexistro de entidades deportivas de Galicia..

De conformidade co artigo 49.2 do Decreto 16/2018, están lexitimadas para formular reclamacións en materia electoral as persoas representantes das candidaturas ou as persoas ou entidades afectadas polos acordos da xunta electoral. Así mesmo, o artigo 51.2 do mesmo decreto reconece lexitimación para interpoñer recurso electoral ante o Comité Galego de Xustiza Deportiva ás persoas que fosen parte na impugnación ante a xunta electoral federativa ou ás persoas interesadas directamente polo acordo ou resolución impugnada.

No presente caso, o club recorrente foi parte na reclamación presentada ante a Xunta Electoral contra o censo electoral provisional e resulta directamente afectado pola correcta conformación do censo, na medida en que este determina o corpo electoral, a composición dos estamentos e o desenvolvemento do proceso electoral federativo. En consecuencia, debe recoñecerse a súa lexitimación para impugnar a desestimación expresa.

Terceiro. Obxecto do Recurso. Segundo resulta acreditado no expediente, a Xunta Electoral fundamentou a exclusión da entidade na falta dun dos requisitos expresamente previstos no artigo 6.1.b) do Regulamento Electoral, concretamente, na inexistencia de licenza federativa expedida pola Federación Galega de Automobilismo na data da convocatoria electoral.

O recorrente non discute propiamente este feito, senón toda a súa argumentación descansa sobre a consideración de que ese requisito non debería resultar esixible por entender que excede das previsións contidas no Decreto 16/2018, ademais de sinalar que cumpre cos requisitos de actividade e antigüidade ó acreditar cumpridamente a súa inscrición no Rexistro de entidades deportivas e ser organizador de probas de ámbito autonómico e nacional.



Poren, como xa quedou exposto nos fundamentos anteriores, este Comité non pode substituír, nin anular o Regulamento Electoral aprobado pola Asemblea Xeral e ratificado pola Secretaría Xeral para o Deporte, nin deixar de aplicalo mentres permaneza plenamente vixente.

En consecuencia, acreditada a inexistencia da licenza requirida e sendo este un requisito obxectivo expresamente previsto pola normativa electoral específica, a Xunta Electoral limitouse a aplicar o Regulamento Electoral, debendo confirmarse a resolución electoral.

Por todo o exposto,

O PLENO DO CGXD por unanimidade acorda, DESESTIMAR INTEGRAMENTE o recurso interposto e confirmar na súa integridade as resolucións cuestionadas da Xunta Electoral - Acta nº3 – respecto do recorrente, non sendo procedente acceder á modificación do censo electoral provisional da FGA.

Notifíquese ás persoas interesadas, facéndolles saber a todos eles que a presente resolución pon fin á vía administrativa, polo que contra ela cabe recurso contencioso-administrativo ante os Xulgados do Contencioso-Administrativo de Santiago de Compostela no prazo de dous meses contado desde o día seguinte ao da súa notificación, de conformidade co establecido no artigo 46 da Lei 29/1998, do 13 de xullo, reguladora da xurisdición contencioso-administrativa.

Santiago de Compostela, 8 de xullo de 2026.

O Pleno do comité Galego de Xustiza Deportiva

P.O. A secretaria

